

En memoria da

## Leci Antoni Cavegn-Paly, Camischolas



(Corr.) Ils 18 da zercladur 1979 ha il zenn da sogn Vigeli annunziau la mort da nies preziau convischin Leci Antoni. El ha rendiu sia olma al suprem Scaffider en la casa da s. Martin a Trun. Cun il defunct svanescha puspej ina figura originala ord in da nos vitgs romontschs.

Leci Antoni Cavegn ei naschius 1895 a Rueras/Tujetsch. Sco emprem affon da 5 fargliuns dils geniturs Giachen e Maria Margreta Cavegn, nata Jacobmet. Leu eis el cärschius si en quei ambient ensemen cun ses auters fargliuns. Ina veta d'oraziun, lavur e spargnusasadad ha cumpignau nies bien Leci Antoni atras sia veta. El fuva auters onns, che quels che nus havein oz. Tgisà quals ch'ein megliers? Denton, la roda dalla veta san ins buca menar anavos. Latg, paun e carn, quei miravan ins dad haver, ed ins fuva cuntents da sia sort. Ed oz? – Daventaus in taffer mat ei l'uiara da 1914 rutta ora. Biars umens han stuiu serender als confins da nossa cara patria. Il bien Leci Antoni fageva bu-

ca militar, denton, ferton ch'el fuva occupaus sin il frust cun las lavurs ei vegniu cumandau ad el dad ir enta d'alp, essend ch'ins haveva stuiu schar leu tut agradgiu ed ir als confins. Tut ei vargau. El segidava sco il basegns sedumandava.

1931 ha Leci Antoni cattau a Camischolas sia spusa Cristgina Paly. Da quella lètg ventireivla ein sorti 2 feglis e 3 feglas. Ils emprems onns ein els secasai en la pintga ucliva a Zarcuns en ina casa che s'udeva ad in da ses fargliuns. Allura ein els serertratgs a Camischolas en la casa dalla consorta. Rumpend la secunda uiara mundiala ora 1939, ei tut vegniu raziu-nau. Leci Antoni ha giu igl uffeci da controllar las cartas. Ina lavur empau hanada e buca adina emperneivla. El ei staus lu – sco ins scheva – statalter, rendend bia buns survetschs alla vischernaunca. Ils uffecis e las schar-schas ha el adempliu cun grond senn da responsabladad. Vegneva el sin vischernaunca cun siu meini, savevan ins ch'ei era ponderau. Ins tedlava ed appreziava siu votum. Leci Antoni era in um da gronda religiusedad. Sia devisa ei adina stada: ura e lavura, sche gida Dieus Tei lura.

Igl onn 1968 piarda el la buna consorta e mumma. Quei ha schau anavos en el ina profunda plaga e gronda encarschadetgna. Suenter enzacons onns da dimora a Camischolas eis el sede-cidius da ira a Trun tier sia feglia Tresa. Quella ha giu grond e bien quitau dil bab entochen ils davos meins ch'el ha passentau en la casa da vegls s. Martin. Aunc oz dat ei exemplarics affons che sestenan plein quitau per lur geniturs. La pagaglia spetga segiramein in di sin els. Bien vischin, ruaussa enten il Segner ed a bien seveser en in meglier mund!

G.F.